



Lærdal, 21.06.2021

Valdansvarlege Lærdal

Vår ref.
21/83-20

Dykkar ref.

Sakshandsamar
Knut Fredrik Øi,

Arkiv
K2-K40

Informasjon om hjort- og elgjakta - Lærdal 2021

I det følgjande har me oppsummert hovudpunkta knytt til hjort- og elgjakta i 2021. Informasjonen vert sendt ut på e-post slik at det er lett for dykk som valdansvarlege å senda vidare ut til grunneigarar og jegerar i dykkar vald. Informasjonen vert også sendt ut i brevform, med det formelle fellingsløyvet. De kan likevel sjå i vedlegga kva som er tildelinga av hjort og elg.

Det er stort fokus på førebyggjing av smittespreiing av skrantesjuka i hjorteviltverdenen for tida. Som kjend vart det diverre påvist skrantesjuka på Hardangervidda i 2020. Skrantesjuka vil nok vera premissleverandør for hjorteviltforvaltninga i områda våre i mange år framover. Heldigvis er det ikkje påvist smittsam skrantesjuka på korkje hjort eller elg! Som eit smitteførebyggjande tiltak anbefalar staten at det skal vera låge tettleiker av hjortevilt kring Nordfjella og Hardangervidda framover.

Dei siste åra er det felt ca 450 hjort årleg i Lærdal. Sett-hjort-tala og vårteljingane tyder på at bestanden er relativt stabil med eit uttak i denne størrelsesordenen og med ein stor andel kalv/ungdyr i uttaket. For å redusera bestanden i Lærdal er det difor naudsynt å fella vesentleg meir hjort. Me lyt tenkja at denne reduksjonen er for å bidra til at dei neste generasjonane med jegerar også kan få nytta godt av sunne og livskraftige hjorteviltbestandar.

Lærdal kommune har saman med Lærdal bestandsplanområde forsøkt å identifisera verkemiddel for å få auka avskytinga allereie denne hausten. Meir om det under «kvote».

I punkta under prøver me å lista opp viktig informasjon for jakta til hausten. Om det er spørsmål, er det berre å ta kontakt!

Kvote

Gjeldande bestandsplan for hjort er for perioden 2020-2022. Det er i bestandsplanen bestemt ein kvote på 766 fellingsløyve for hjort i 2021. Dei valda som er medlem i Lærdal bestandsplanområde, kan nytta dei ubrukte løyva frå 2020. Dette er 279 løyve. Totalt er det difor 1045 fellingsløyve tilgjengeleg i 2021. For elg er det 61 fellingsløyve og for rådyr er det 1 fellingsløyve. Sjå vedlegg for fordeling på dei ulike valda.

Som eit ekstra verkemiddel har Lærdal kommune, i samarbeid med styret i bestandsplanområdet, søkt Miljødirektoratet om dispensasjon til å ha fri kvote på kalv og ungdyr av hjort. Info om dette kjem når vedtaket frå Miljødirektoratet er klart.

Det er også høve til å flytta fellingsløyve mellom vald som er medlem i Lærdal bestandsplanområde. Slik flytting krev skriftleg avtale mellom valda.

Adresse	Telefon	E-post	Bank	Org.nr
Øyrapllassen 7,6887 Lærdal	57641200	post@laerdal.kommune.no	3838 07 60328	954 681 890

Jakttid

Kommunane kring Nordfjella har utvida jakttid på elg og hjort. Den formelle jakttida er 15. august-31. januar. Det er freding frå jul til nyttår. Det er heller ikkje lov å nytta laus hund i periodene 15. aug.–1. sept. og 1. jan.–31. jan.

Jakttida for rådyr er delt:

- Vaksen rådyrbukk: 10. august-23. desember
- Anna rådyr: 25. september-23. desember.

CWD – prøvetaking

Alle felte dyr som er vaksne skal jegerane ta prøve av sjølv (altså ikkje kalvar og 1,5 åringer). Prøveresultatet er svært viktige for vegen vidare. Info og utlevering av prøvemateriell skjer som i fjor, på jegermøte i august og i kasse hjå Magne Eri. All generell informasjon om CWD er samla på: <http://www.hjortevilt.no/skrantesjuka/>

Kjeveinnsamling

Det vert kjeveinnsamling for aldersanalyse i Lærdal i 2021. Prosjektet er finansiert av Miljødirektoratet. Eit mål er å finna ut om fallviltet har ein anna alder enn hjorten som vert felt under jakt. I tillegg er det ønskeleg å få alderen på dyra som vert teste for skrantesjuka. Kjevane av ungdyr og vaksne elg og hjort vert levert i kassa hjå Magne Eri. Dei skal vera reinskårne og turre.

Jegermøte

Me planlegg å ha jegermøte i Lærdal onsdag 11. august. Meir info om stad og klokkeslett kjem seinare.

Helikopter

Det vert tilbod om gratis uttransport av slakt kvar søndag frå 15. aug. og ut oktober i Lærdal. Info om korleis dette fungerer vert sendt ut når det er klart. Det er Statens Naturoppsyn som står for utflyginga.

Sal av slakt

Når det skal fellast mykje hjort, kan det kanskje vera trong for å selja unna eit slakt eller to. Haugen gardsmat i Flåm v/Odd Ohnstad kjøper slakt. Telefonnummeret til Odd er 915 39 026.

Sett-og-skutt

All jakting skal registrerast på Hjorteviltregisteret. Det er viktig også å registrera jaktdagane utan felling eller observerte dyr. Registreringane gjerast anten ved å logga deg inn på www.hjorteviltregisteret.no eller ved å lasta ned settogskutt-appen. Når det skal fellast mykje hjort i Lærdal er det svært viktig at alle jegerane registrerer jaktinga si fortløpande. Då kan kommunen og styret i bestandsplanområdet følgja med på status felling og måloppnåing. Her er det ennå mykje å gå på i Lærdal!

CWD-prøvene skal også registrerast her. Prøvesvaret finn de på hjorteviltregisteret under «Helse»-fana i Hjorteviltregisteret.

I 2018 vart det gjort nokre endringar på korleis jegerane skulle registrera jaktinga si på settogskutt. I korte trekk var endringa den at alle observerte dyr skulle registrerast, uavhengig

av om dyret med sikkerhet var sett fleire gonger/av andre. Me trur ikkje mange fekk med seg denne endringa, fordi det ikkje var godt marknadsført. I tida no er sett-hjort-registreringane viktigare enn nokon gong fordi me på den måten kan følgja med på endringane i bestanden opp i mot målet om reduksjon. Ei endring i måten å føra på er difor uheldig fordi det vert vanskelegare å samanlikna tala mellom åra. Difor har me beslutta at me **IKKJE VIL FØLGJA** endringa som det er lagt opp til i føring av sett-hjort. Alle jegerar i Lærdal skal altså føra sett-hjort som før, og ikkje ta hensyn til endra instruks! Ergo, registrer sett-hjort som «vanleg»!

Human jakt

Sjølv om det er ønskjeleg med høgt fellingsresultat, er det viktig at de tenkjer sikkerheit og human jakt når de er ute. Skyt kalven før kolla! Hugs plikten til å ha tilgang på ettersøkshund – og bruk hunden når uhellet er ute! Her har me ein del å gå på!

Samarbeid

Dei valda som er medlem i bestandsplanområdet har moglegheit til å flytta løyve mellom valda, og mellom åra i bestandsplanperioden. Dette er brukt i ein viss utstrekning, men det er mogleg/ønskjeleg å nytta dette endå meir. Kanskje 2021 er året for å debutera i «løyveflytting»? For å flytta løyve mellom åra i planperioden trengs det ingen avtale. Eit vald som har igjen løyve frå 2020, kan nytta desse no denne hausten. Alle fellingane skal meldast inn i fellingsrapporten det året dei er felt. For å flytta løyve mellom vald som er medlem i bestandsplanområdet, må valda ha ei skriftleg avtale om samjakt. Ta kontakt om du ønskjer eit ferdig formular på dette. Det valdet som får fellingsløyvet tildelt, skal rapportera resultatet, uavhengig av om løyve er nytta på eit anna vald. På settogskutt registrerer jegerane fellingane på det valdet som dyret vart jakta på. Fellingsavgifta vert fakturert valdet som fekk løyvet. Det som truleg vil vera begrensande for jaktuttaket til hausten er jegeranes tilgjengelege tid til å jakta. Dei valda som «føler seg ferdig» med å jakta i løpet av hausten og som har mykje dyr i terrenget, bør vurderer om dei kan slippa fleire jegerar inn i terrenget. Dette kan gjerast anten ved at jegerar har med «eigne fellingsløyve» eller at fleire jegerar kan koma inn og jakta på dei løyva som er gitt det aktuelle valdet. Dei merka hjortane fortel oss at dyra nyttar mange vald i løpet av året. Dei dyra som ein kanskje opplever som «eigne dyr», flytter seg oftast mykje, både i løpet av døgeret og sesongen.

Fellingsavgift

Avgift ved felling i 2021 er som følgjande:

Fellingsavgift	2021
Hjort ≥ 1,5 år	411
Hjort kalv	169
Elg ≥ 1,5 år	537
Elg kalv	218

Rapportering

Frist for rapportering til kommunen er 14 dagar etter endt jakttid. Nytt av året er at valdansvarleg kan gjera dette i hjorteviltregisteret. Info om dette vert sendt ut frå Hjorteviltregisteret til valdansvarleg. Det er også mogleg å rapportera «som før» via løyveskjemaet som då skal sendast til kommune. Me oppmodar om at flest mogleg rapporterer digitalt via Hjorteviltregisteret.

Skitt jakt!

Med helsing

Knut Fredrik Øi
sakshandsamar

Brevet er elektronisk godkjent og er utan underskrift

Vedlegg:

Dok.dato	Tittel	Dok.ID
21.06.2021	Tildeling av fellingsløyve for hjort, elg og rådyr - Lærdal kommune 2021	181894
21.06.2021	Tildeling av fellingsløyve for hjort, elg og rådyr - Lærdal kommune 2021	181738
21.06.2021	Lærdal løyvetildeling 2021 hjort - vald med bestandsplan	181739
21.06.2021	Lærdal løyvetildeling 2021 hjort - vald utan bestandsplan	181740
21.06.2021	Lærdal løyvetildeling 2021 elg	181741
21.06.2021	Lærdal løyvetildeling 2021 rådyr	181742